

ESTATUTOS

CAPÍTULO 1 DENOMINACIÓN, FINS, DOMICILIO E ÁMBITO

Artigo 1. Coa denominación - CMAT (COSTA DA MORTE ASOCIACIÓN DE TURISMO)- constitúese unha ASOCIACIÓN ao amparo da Lei Orgánica 1/2002, de 22 de marzo, e normas complementarias, con personalidade xurídica e plena capacidade de obrar, carecendo de ánimo de lucro.

Os beneficios que obteña por calquera concepto destinaranse exclusivamente ao cumprimento dos fins da asociación, sen que se poidan repartir entre os/as asociados/as nin outras persoas físicas ou xurídicas con fins lucrativos.

Artigo 2. Esta Asociación constitúese por tempo indefinido.

Artigo 3. A Asociación constitúese con finalidade de ser o núcleo de integración e representación dos diferentes axentes territoriais, institucionais, sociais e económicos, tanto públicos como privados, interesados en promover o desenvolvemento do territorio de actuación, en materia turística, para conseguir os seguintes fins:

- a) Promocionar o destino turístico COSTA DA MORTE.
- b) Mellorar a calidade e a innovación permanentemente en servizos e produtos turísticos, desenvolvéndoos con criterios de sustentabilidade.
- c) Consolidar e ampliar a oferta cara aos segmentos con maior potencial de crecemento do turismo COSTA DA MORTE para afrontar con éxito o desenvolvemento global do sector da comarca.
- d) Fortalecer e ampliar a oferta turística da COSTA DA MORTE para afrontar con garantías os retos e oportunidades dos segmentos turísticos consolidados.
- e) A Asociación ten así mesmo como fin contribuír ao desenvolvemento económico e social na súa zona de actuación, facilitando unha estrutura de concertación, cooperación, asesoramento e apoio directo que lle permita:

- Recadar a colaboración dos poderes públicos, suscitar a materialización e proxectos de desenvolvemento turístico no marco das convocatorias de ámbito autonómico, estatal e da Unión Europea.

- Participar naquelas iniciativas e programas locais, autonómicos, estatais ou comunitarios que se convoquen que poidan ser de interese para a asociación

Artigo 4. Para o cumprimento destes fins poderíanse realizar, entre outras, as seguintes actividades:

- a) Edición de catálogos e material promocional en varios idiomas.
- b) Promoción entre tour-operadores para dar a coñecer a oferta existente no destino turístico a través do reparto de material promocional e "Fan-Trips".
- c) Asistir a feiras turísticas estatais e internacionais.
- d) Garantir a presenza en medios a través da inserción de anuncios en medios de comunicación de masas e publicacións especializadas estatais e internacionais.
- e) Invitar a xornalistas especializados e outros prescitores de repercusión mediática.
- f) Completar a información recollida na páxina web.
- g) Promover unha oferta de calidade en aloxamentos e restauración a través da formación do empresariado (calidade, Internet, etc.).
- h) Poñer en marcha e incentivar a creación de paquetes turísticos multiempresa.
- i) Promover unha oferta diversa a través do apoio á creación de empresas turísticas.
- j) Mellorar a cualificación do persoal e promover o emprego estable no sector turístico.
- k) Concienciar a poboación comarcal sobre a importancia do turismo na COSTA DA MORTE.

- l) Desenvolver unha actividade turística con criterios de sustentabilidade e respecto ao Medio Ambiente.
- m) Ampliar o número de visitantes da COSTA DA MORTE grazas ao turismo provinte doutras áreas de Galicia.
- n) Desenvolver as posibilidades do turismo mariñeiro, natural e cultural.
- o) Potenciar COSTA DA MORTE como destino de “city breaks”(visita de fin de semana).
- p) Promover o desenvolvemento doutros segmentos (turismo de aventura, familiar, etc)
- q) Fortalecemento e posta en valor da oferta patrimonial e cultural da COSTA DA MORTE.
- r) Ampliar e diversificar a oferta cultural baseada no patrimonio inmaterial.
- s) Para o cumprimento dos seus fins, a Asociación CMAT desenvolverá calquera actividade que contribúa á consecución dos fins fundacionais, por si mesma ou coa axuda ou colaboración de entidades ou institucións públicas ou privadas.

Artigo 5. A Asociación establece o seu domicilio en Lugar de Lires nº 82, CP 15270 –Concello de Cee, Provincia de A Coruña. Sen que o traslado do mesmo, acordado por Asemblea Xeral e dentro do ámbito de actuación da Asociación, supoña a alteración do presentes Estatutos.

Mediante acordo da Xunta Directiva, poderán ser creados locais sociais no territorio de actuación. O ámbito territorial delimita o Xeodestino Costa da Morte, que está integrado por 17 concellos: A Laracha, Carballo, Coristanco, Zas, Vimianzo, Dumbria, Camariñas, Muxía, Cee, Fisterra, Corcubión, Carnota, Mazaricos, Cabana de Bergantiños, Laxe, Ponteceso e Malpica, dentro da Provincia da Coruña.

O mapa dos xeodestinos preséntao a Xunta de Galicia, segundo a estratexia de planificación establecida no Plan de Acción do Turismo 2010-2013.

CAPÍTULO II **ÓRGANOS DE REPRESENTACIÓN**

Artigo 6. A Xunta Directiva é o órgano reitor da Asociación. Na súa actuación someterase ás directrices que lle sinale a Asemblea Xeral, debendo cumprimentar os seus acordos, e terá as facultades que se conceden nos presentes Estatutos e no Regulamento de Réxime Interior.

A asociación será xestionada e representada por unha Xunta Directiva formada por: un/unha presidente/a, un/unha vicepresidente/a, un/unha secretario/a e un/unha tesoureiro/a e vogais no seu caso, e estará composta por un mínimo de 5 membros e un máximo de 7. Todos os cargos que compoñen a Xunta Directiva serán gratuítos. Estes serán designados e revogados pola Asemblea Xeral e o seu mandato terá unha duración de dous anos. A renovación farase pola metade cada dous anos, para permitir unha continuación progresiva e non traumática da xestión da asociación, sendo reelixibles os membros saíntes.

- En caso de vacante por renuncia ou dimisión, a Xunta Directiva pode completarse por si mesma, nomeando substituto con carácter provisional que, na seguinte Asemblea Xeral, deberá ser confirmado nas súas funcións para poder continuar.

- Para os membros da Xunta Directiva 5 faltas de asistencia consecutivas e non xustificadas ás reunións da mesma poderán ser causa do seu cese.

6.1 A Xunta Directiva será o órgano competente para interpretar os preceptos contidos nos presentes Estatutos e cubrir as súas lagoas, sempre someténdose á normativa legal vixente en materia de Asociacións. Os presentes Estatutos serán cumpridos mediante os acordos que validamente adopte a Xunta Directiva.

Artigo 7. Os membros da Xunta Directiva poderán causar baixa por renuncia voluntaria, comunicada por escrito á Xunta Directiva, por incumprimento das obrigas que tiveran encomendadas ou por expiración do mandato.

Artigo 8. Os membros da Xunta Directiva que esgotaran o prazo para o cal foron elixidos, continuarán ostentando os seus cargos ata o momento en que se produza a aceptación dos que os substitúan.

Artigo 9. A Xunta Directiva reunirse tantas veces o determine o/a seu/súa presidente/a e a iniciativa ou petición de calquera dos seus membros. Quedará constituída cando asista a

metade máis un dos seus membros e para que os seus acordos sexan válidos deberán ser tomados por maioría de votos. Poderán participar nas reunións da Xunta Directiva, con voz pero sen voto, técnicos municipais, (interventor/a, secretario/a, etc), ou calquera outro persoal especializado na materia que se vaia a tratar cando fose necesario. No caso de empate, o voto do/a presidente/a será de calidade.

Artigo 10. Facultades da Xunta Directiva:

As facultades da Xunta Directiva estenderanse, con carácter xeral, a todos os actos propios das finalidades da Asociación, sempre que non se requira, segundo estes estatutos, autorización expresa da Asemblea Xeral.

Son facultades particulares da Xunta Directiva:

- a) Dirixir as actividades sociais e levar a xestión económica e administrativa da Asociación, acordando realizar os oportunos contratos e actos.
- b) Executar os acordos da Asemblea Xeral.
- c) Formular e someter á aprobación da Asemblea Xeral os balances e as contas anuais.
- d) Resolver sobre a admisión de novos/as asociados/as.
- e) Nomear delegados/as para algunha determinada actividade da Asociación.
- f) Calquera outra facultade que non sexa da exclusiva competencia da Asemblea Xeral de socios e socias.

Artigo 11. O/a presidente/a terá as seguintes atribucións: representar legalmente á Asociación ante toda clase de organismos públicos ou privados; convocar, presidir e levantar as sesións que celebre a Asemblea Xeral e a Xunta Directiva, así como dirixir as deliberacións dunha e outra; ordenar pagos e autorizar coa súa firma os documentos, actas e correspondencia; adoptar calquera medida urxente que a boa marcha da Asociación aconselle ou que no desenvolvemento das súas actividades resulte necesaria ou conveniente, sen prexuízo de dar conta posteriormente á Xunta Directiva.

Artigo 12. O/a vicepresidente/a substituirá ao/á Presidente/a en ausencia deste/a, motivada por enfermidade ou calquera outra causa, e terá as mesmas atribucións que el/ela.

Artigo 13. O/a secretario/a terá a cargo a dirección dos traballos puramente administrativos da Asociación, expedirá certificacións, levará os libros da Asociación legalmente establecidos e o arquivo de asociados/as, e custodiará a documentación da entidade, facendo que se cursen as comunicacións sobre designación de Xuntas Directivas e demais acordos sociais inscribibles nos Rexistros correspondentes, así como o cumprimento das obrigas documentais nos termos que legalmente correspondan.

Artigo 14. O/a tesoureiro/a recadará e custodiará os fondos pertencentes á Asociación e dará cumprimento ás ordes de pago que expida o/a Presidente/a.

Artigo 15. Os/as vogais terán as obrigas propias do seu cargo como membros da Xunta Directiva, así como as que nazan das delegacións ou comisións de traballo que a propia Xunta lles encomende.

Artigo 16. As vacantes nos cargos que se puideran producir durante o mandato de calquera dos membros da Xunta Directiva, serán cubertas provisionalmente entre ditos membros ata a elección definitiva pola Asemblea Xeral convocada ao efecto.

CAPÍTULO III **ASEMBLEA XERAL**

Artigo 17. A Asemblea Xeral é o órgano supremo de goberno da Asociación e estará integrada por todos/as os/as asociados/as. Non poderán ser obxecto de discusión nin votación aquelas cuestións que non estean previamente fixadas na orde do día. Cada membro poderá votar en nome propio e no de calquera outro que lle outorgue a súa representación, considerándose a

efectos do quórum da Asemblea que o representado está presente. Non poderá outorgarse a cada membro máis dunha representación.

Artigo 18. As reunións da Asemblea Xeral serán ordinarias e extraordinarias. A ordinaria celebrarase unha vez ao ano dentro dos catro meses seguintes ao peche do exercicio; as extraordinarias celebraranse cando as circunstancias o aconsellen, a xuízo do/a presidente/a cando a Xunta Directiva o acorde ou cando o propoña por escrito unha décima parte dos/as asociados/as. Nas reunións ordinarias poderanse incluír novos puntos na orde do día por iniciativa do/a Presidente/a ou dun terzo dos/as asociados/as previa ratificación por maioría, antes de iniciar o primeiro punto.

Artigo 19. As convocatorias das Asembleas Xerais realizaranse por escrito expresando o lugar, día e hora da reunión, así como a orde do día con expresión concreta dos asuntos a tratar. Entre a convocatoria e o día sinalado para a celebración da Asemblea, en primeira convocatoria, terán que mediar polo menos quince días, podendo así mesmo facerse constar se procedese a data e hora na que se reunirá a Asemblea en segunda convocatoria, sen que entre unha e outra poida mediar un prazo inferior a unha hora. Por razóns de urxencia xustificada, poderán reducirse os prazos no que respecta á convocatoria das Asembleas Xerais extraordinarias

Artigo 20. As Asembleas Xerais, tanto ordinarias como extraordinarias, quedarán validamente constituídas en primeira convocatoria cando concorran a ela a maioría dos/as asociados/as con dereito a voto, e, en segunda convocatoria, cando concorra como mínimo un terzo dos/as asociados/as con dereito a voto.

Os acordos tomaranse por maioría simple das persoas presentes ou representadas cando os votos afirmativos superen os negativos, non sendo computables a estes efectos os votos nulos, en branco, nin as abstencións.

Será necesario maioría cualificada dos/as socios/as, que resultará cando os votos afirmativos superen a metade desta, para:

- a) Disolución da entidade.
- b) Modificación de Estatutos.
- c) Disposición ou alleamento de bens integrantes do inmovilizado.
- d) Establecemento de dietas e de compensacións de gastos dos membros do órgano de representación.

Artigo 21. Son facultades da Asemblea Xeral:

- a) Aprobar a xestión da Xunta Directiva.
- b) Examinar e aprobar as contas anuais.
- c) Elixir os membros da Xunta Directiva.
- d) Aprobar os proxectos presentados pola Xunta Directiva.
- e) Fixar as cotas ordinarias ou extraordinarias.
- f) Disolver a Asociación.
- g) Modificar os Estatutos.
- h) Dispoñer o alleamento dos bens.
- i) Calquera outra cousa que non sexa competencia atribuída a outro órgano social.
- j) Aprobar a solicitude da declaración de utilidade pública.

Artigo 22. Requiren acordo da Asemblea Xeral Extraordinaria convocada ao efecto:

- a) Modificación dos estatutos.
- b) Disolución da Asociación.

CAPÍTULO IV **SOCIOS/AS**

Artigo 23. Poderán pertencer á Asociación os concellos e aquelas persoas xurídicas de agrupación, federación ou confederación de empresas hostaleiras ou turísticas, cuxo ámbito de actuación abarque a totalidade do Xeodestino, que teñan presenza na maioría dos concellos deste territorio e que teñan interese no desenvolvemento dos fins da Asociación ou os concellos pertencentes ao territorio.

A solicitude de ingreso farase mediante un escrito, dirixido ao/á presidente/a, no que se manifeste a vontade expresa de adherirse á asociación e o compromiso coa consecución dos fins estatutarios. Debe achegar ademais acordo do órgano competente da entidade que exprese a vontade de ser asociado e a persoa que o/a representará na asociación. A solicitude trasladarase á Xunta Directiva que deberá resolver nun prazo non superior a dous meses desde a súa recepción. A Xunta Directiva poderá solicitar canta documentación estime oportuna para a resolución do ingreso.

Artigo 24. Dentro da Asociación existirán as seguintes clases de socios/as:

- a) Fundadores/as, que serán aqueles/as que participen no acto de constitución da Asociación.
- b) De número, que serán os/as que ingresen despois da constitución da Asociación.

Artigo 25. Os/as socios/as causarán baixa por algunha das causas seguintes:

- a) Por renuncia voluntaria, comunicada por escrito á Xunta Directiva.
- b) Por incumprimento das obrigas económicas.
- c) Por lesión dos fins da Asociación.
- d) Por incumprimento dos deberes inherentes ao seu carácter de membro.

No casos comprendidos nos apartados b), c) e d) correspóndelle á Xunta Directiva acordar a separación do membro, previa instrución dun expediente no que se dará audiencia ao/á interesado/a. A baixa na asociación, non eximirá do cumprimento das obrigas e compromisos de calquera natureza que o/a socio/a tivese pendente.

Artigo 26. Os/as socios/as de número e fundadores/as terán os seguintes dereitos:

- a) Tomar parte en cantas actividades organice a Asociación en cumprimento dos seus fins.
- b) Gozar de todas as vantaxes e beneficios que a Asociación poida obter.
- c) Participar nas Asembleas con voz e voto.
- d) Ser electores/as e elixibles para os cargos directivos.
- e) Recibir información sobre os acordos adoptados polos órganos da Asociación.
- f) Facer suxestións aos membros da Xunta Directiva en orde ao mellor cumprimento dos fins da Asociación.

Artigo 27. Os/as socios/as fundadores/as e de número terán as seguintes obrigas:

- a) Cumprir os presentes Estatutos e os acordos válidos das Asembleas e da Xunta Directiva.
- b) Aboar as cotas que se fixen.
- c) Asistir ás Asembleas e demais actos que se organicen.
- d) Desempeñar, no seu caso, as obrigas inherentes ao cargo que ocupen.

CAPÍTULO V DOS RECURSOS E DO PATRIMONIO

Artigo 28. Os recursos económicos previstos para o desenvolvemento dos fins e actividades da Asociación serán os seguintes:

- a) As cotas de socios/as, periódicas ou extraordinarias, que aprobe a Xunta Xeral.
- b) As subvencións, legados ou herdanzas que se puidesen recibir de forma legal por parte dos/as asociados/as ou de terceiras persoas.
- c) Calquera outro recurso lícito.

Artigo 29. A asociación no momento de constitución carece de Fondo Social.

Artigo 30. O exercicio asociativo e económico será anual e o seu peche terá lugar o 31 de decembro de cada ano.

CAPÍTULO VI **DISOLUCIÓN**

Artigo 31. Disolverase voluntariamente cando así o acorde a Asemblea Xeral Extraordinaria, convocada ao efecto, con arranxo ao disposto no art. 20 dos presentes estatutos.

Artigo 32. No caso de disolución, nomearase unha comisión liquidadora, a cal, unha vez extinguidas as débedas, se existise sobranse líquido destinarao para fins que non desvirtúen a súa natureza non lucrativa.

DISPOSICIÓN ADICIONAL

En todo canto non estea previsto nos presentes estatutos aplicárase a vixente Lei Orgánica 1/2002, de 22 de marzo, reguladora do dereito de asociación, e as disposicións complementarias.

En VIMIANZO, a, 28 de Abril de 2016

SINATURAS.